

欽定剿平粵匪方略

欽定剿平粵匪方略卷二十九 癸丑年

二月十七日 壬辰 楊文定奏言 臣自丹陽拜摺後

折回鎮江豫籌水陸進剿其東省兵由宿州而  
來及向榮分兵由皖前來均須由浦口渡江現  
在浦口江路梗塞 臣差弁迎探一面傳知沿途  
州縣豫備車馬船隻轉請帶兵官繞赴六合儀  
徵而至瓜口渡江一面爲進剿之計江甯被圍

文報不通僅於初五日接據前督臣陸建瀛初二日遣人縋城遞出咨文一角內稱省垣二十九至初二等日賊匪晝夜攻擊勢甚危急鎮江雖關緊要究不若省垣爲根本重地請急撥兵數千救援等因臣心急如焚向榮又無來甯確耗惟俟山東勁兵二千名到後加以此間北勇千名卽令葉常春統帶前赴句容或龍潭駐紮

雖未必遽解重圍但使城內聞知外有援兵其  
膽自壯而鎮揚蘇常等府亦可恃以無驚水路  
則上海道已添雇艇船數隻配以現在師艇各  
船並備帶火船十餘隻遇東北風起便可密約  
水陸進攻惟現在山東官兵僅到四百名不敷  
進剿惟有仍懇

天恩嚴飭向榮陳金綬限以時日飛速來甯以救危急

楊文定又奏言再臣正在拜摺間接據探報江甯省垣於十一日被賊偷挖地道暗用地雷轟開儀鳳門而入一云城內有漢奸放火爲號賊卽由火起處用蜈蚣梯爬入省城失守等語臣查江甯城高池深猶不可守東南半壁尙何能爲隨與副都統文華會商鎮江祇一空城且形如釜底防守甚難況各險隘派兵分防均嫌單

薄不若聚於扼要處所猶堪一戰查有山嘴頭  
地方係從龍潭句容來鎮總路當將城內旗兵  
八百名山東官兵四百名調赴江甯之狼山營  
兵三百名一併飭赴該處紮營駐守由文藝統  
帶當此時事萬難臣仍竭力支撐或居中調度  
或由水陸進擊截其來路保此瓜口使大軍及  
文報可通以待援兵大集伏乞

皇上下振天威嚴飭各大臣飛速前來極力勦洗以圖  
克復奏入

上命軍機大臣傳諭楊殿邦楊文定曰江甯省城失守  
現授怡良爲兩江總督飭令督帶前調之閩兵二千  
名星馳就道然到尙需時楊文定與文藝因鎮江不  
能防守匯集兵力駐守山嘴頭地方亦祇可如此辦  
理所有句容至丹陽東壩至蘇州各陸路務須節節

堵截楊殿邦前奏向榮已抵六合上游刻下諒已渡江著該漕督卽與向榮南北聯絡策應嚴防江口斷不可致有阻隔

上又命軍機大臣傳諭琦善陳金綬向榮曰據楊文定奏江甯省城於本月十一日失守覽奏曷勝憤懣前曾屢諭向榮陳金綬趕赴金陵不料救援不及一誤至此昨據楊殿邦奏向榮已繞赴六合上游儻因江



浦失守賊踞要口著卽督兵迅擊剋期渡江相機攻  
剿使逆賊不敢窺伺蘇常仍可與江北聲勢聯絡以  
圖克復現在賊踞江甯江北要隘最關緊要琦善陳  
金綬督帶重兵旣不及救援江南則江北一帶是其  
專責必須嚴密防守內戢土匪外遏賊匪北竄之路  
現在黑龍江馬隊已抵宿州與前隊吉林官兵均當  
擇要布置以備攻剿並將現在如何辦理情形迅卽

馳奏

上又命軍機大臣傳諭李德曰據楊文定馳奏江甯失  
守鎮江以南固形喫重而江北黃河毗連處所尤爲  
可慮該撫現在兗沂曹一帶巡防大河千里處處險  
要想已妥爲布置竭力設防其上鄰河南下接江蘇  
各州縣應如何合力防守仍須隨時知照楊以增福  
濟一體稽查堵截

上諭內閣曰楊文定奏江甯省城失守覽奏不勝憤恨  
惟該撫接據探稟逆賊於二月十一日偷挖地道轟  
開儀鳳門又有奸匪內應賊見火起梯城而入究竟  
如何情形合城滿漢文武官員如何下落紳士商民  
遭此慘劫南望增悲若使援兵早到何至旬日之間  
遽行失守現已命怡良補授兩江總督星馳赴任楊  
文定駐守鎮江著卽暫署兩江總督事務聯英著暫

行辦理江蘇巡撫事務向榮刻下諒已渡江著卽相機攻剿並督率前調師船水陸扼要與楊文定等合力夾擊毋令蔓延所有江南被賊擾害各州縣應徵新舊錢糧著楊文定迅卽查明奏請蠲緩其附近地方居民防堵方殷難安耕作著一併查明分別奏請恩施

上又諭內閣曰怡良著補授兩江總督迅卽馳驛前赴

新任並將前調之福建精兵二千名起緊催赴江南  
以資防剿

十八日癸巳楊殿邦奏言江甯省城於本月十一

日失守現在逆匪盤踞城內外不下十數萬人  
四路劫掠勢甚猖獗伏查瓜州城圯於水無險  
可恃上下沿江數十里皆散漫平川處處可以  
登陸儀徵揚州又水陸紛歧非重兵數萬扼要

分防難期堵禦臣雖團練糧船水手招募壯勇  
皆係未經行陣僅可恃以防守接仗則未能得  
力臣所調漕標及揚州本營各兵合計不足千  
名此外所調官兵尙無一起到揚何以禦此巨  
寇瓜揚設有疏虞北路震動關繫不淺惟有仰  
懇

皇上速簡重臣統領勁兵數萬星馳來揚會同勦辦俾

得早滅醜類

楊殿邦又奏言儀徵濱臨大江所募勇丁僅止二千餘名亦屬單薄前聞向榮已繞至六合上游至今仍未到江而琦善所統大兵現在行抵何處亦無文報若再遷延不到瓜揚望救無兵設或逆匪遙至其何能禦仰懇

皇上嚴飭向榮琦善各統大兵迅抵瓜揚與臣併力進

勦奏八

上命軍機大臣傳諭楊殿邦楊文定曰江甯失守賊匪  
勢甚猖獗刻下調兵遠處斷難接濟惟向榮陳金綬  
兩路重兵可以就近援應楊殿邦接奉此旨著一面  
迅催向榮設法渡江攻勦一面飛催陳金綬帶兵直  
赴淮揚合力防守其安徽江北一帶琦善統領大兵  
在後接應仍可與周天爵及該督等互爲聲援也



上諭內閣曰署理四川總督慧成現在行抵陝西著卽  
折回馳驛前往江南淮揚徐州一帶會同楊殿邦辦  
理防剿事務

同日浙江巡撫黃宗漢奏言近日江甯文報不  
通該省安危未卜儻經大兵進剿逆匪勢必四  
散奔竄現聞匪船有停泊蕪湖之信查蕪湖由  
水路抵浙歷常州蘇州卽至嘉興由旱路抵浙

歷廣德四安卽至湖州計程均不過三四百里而皆無險可扼臣與司道各官日夕籌商必得於蘇湖一帶實力防堵使匪船不能竄入方足固浙省之門戶並可衛蘇省之藩籬惟徵兵募勇緩不濟急祇有雇覓艇船由上海駛至鎮江及蕪湖各口較爲迅速藩司麟桂前在上海服官熟悉廣艇情形自願前往招募爲江浙兩省

防勦之用臣卽飭令星夜起程會同蘇省妥速  
辦理奏入

上命軍機大臣傳諭黃宗漢曰江甯失守賊勢猖獗藩  
司麟桂自願前往上海招募廣艇該藩司曾任上海  
道於該處情形熟悉著卽督帶船礮駛赴鎮江上游  
一帶相機攻勦一面知照向榮楊文定楊殿邦等南  
北策應儘能將江面賊船痛加轟擊則賊氣已奪旣

可衛蘇省之藩籬亦可固浙江之門戶轉移之機在此一舉

十九日甲午琦善陳金綬奏言臣陳金綬臣琦善

於本月初十十一日先後均抵安徽省城初十日向榮亦由南岸駛至安慶臣等再四熟商向榮仍由南岸水陸前進惟北岸較單不但後路之漢中大名等處官兵未到卽與臣等同在湖

北拔營之兵亦因臣等兼程趨行彼則有鑼鍋帳房等項行走笨滯亦尙未能到齊臣等不及守候一面加緊催提一面就已到之兵由北岸桐城廬江無爲巢縣含山和州等州縣陸路馳行節節追探賊蹤相機擊勦如逆匪直犯江甯亦卽覓渡徑行追擊與向榮約定在東西梁山地方彼此知會彼處距江甯百餘里聲息易通

惟江甯在江南岸下游有賊之處勢必無船可  
渡現已分飭上游之巢縣和州等處豫覓船隻  
以免臨時遲誤臣陳金綬於十二日拔營前進  
臣琦善亦同日起程與臣陳金綬相距數里紮  
營前後接應並與向榮南北聲勢聯絡會合夾  
擊以期有濟

同日向榮奏言賊船於十七日駛至皖省江岸

開礮兵勇皆由北門退走撫臣蔣文慶登陴督陣見兵勇皆潰隨卽自盡文武各官不知下落二更時賊從八卦門大小南門直入搶擄倉庫燒燬衙署十八九二十一二等日賊船陸續開赴下游河州鎮總兵吉順於二十三日馳抵安慶城外二十餘里地方探聞城內尙有逆匪數百人搜括銀物該鎮卽於次早督兵入城分投

追勦斃賊數十人生擒長髮賊十餘名正法餘  
匪逃竄業將省城收復臣抵九江後江干船隻  
賊擄一空無從過渡並因隨征兵勇自上年冬  
臘至今正餉銀未發軍火等項亦已用完必於  
江西省城提撥方能應用且兵勇轉戰數百里  
疲乏難堪斷難速其追勦又江南濱臨大江陸  
路多有支河汊港渡船橋梁悉被賊毀我兵到



彼臨期搭橋覓船亦復耽延時日自正月以來  
又無日不雨道途泥淖難行再四躊躇勢不能  
不由水路而下嗣據各州縣委員稟報江干船  
隻有被賊掠去者有居民雇覓逃難遠去者雖  
飭差四出而雇到寥寥臣一面行咨江西撫臣  
張芾由省代雇並令回空糧船前來載兵一面  
飭令總兵李瑞帶同各營將備親往吳城姑塘

一帶封雇二十三日後僅到百餘隻而撫臣來  
函亦因糧船水手驟難招集多方招募不能剋  
期而至餉銀於二十三日僅到三萬兩臣不得  
已撥大兵六成先行渡江仍由陸路追擊奈春  
兩連縣渡江之兵軍火衣履全行沾溼祇得將  
各路已到之船一百數十隻令貴州廣東官兵  
乘坐先行至二十六日復到餉銀七萬兩卽飭

分給各兵勇催令於二十七日開行並令湖南  
廣西官兵及捷勇提標各項壯勇趕赴姑塘就  
船撫臣張芾又由省城續雇到江船一百一十  
隻軍船三十七隻總兵李瑞於吳城雇到四百  
餘隻楚粵官兵及各勇亦於初一日由姑塘登  
舟開出湖口臣卽於初二日由潯開行川兵繼  
後臣深知金陵喫緊盼援甚殷惟是從前自將

一軍拔營甚易今蒙

皇上畀以重權必須通籌全局布置周密然後可期得手連年以來因見各路官兵每當追賊之時憚於跋涉所有疲弱不前者此時不能不嚴加懲治業將潮勇三千五百名全行撤退張國樑所帶捷勇留一千二百名撤去二千八百名提標五項壯勇留一千二百名撤退四百名通計撤

退六千餘名其襄陽滋事土匪昨經 臣飛調總

兵青德布帶滇黔兵一千二百名署鄖陽鎮總

兵耿文錦帶湖北兵八百名升用遊擊王國材

申有謀等帶滇兵七百餘名馳往會勦業已肅

清所有陝西兵一千名尙未出關自應撤回歸

伍其宜昌兵五百名並湖北兵八百名雲南兵

七百餘名亦已飛咨署湘廣督 臣張亮基就近

撤回至音德布所帶之兵及副將瞿騰龍所帶  
楚兵仍調來營差遣二月初五日臣於彭澤舟  
次接奉

諭旨著兼程趕赴江甯查三江民風柔懦一聞有警相  
率遷徙長江要隘如小孤山等處有險而不能  
守致逆船得以長驅直下臣一路目擊情形不  
勝痛惜惟自九江起程後連日狂風駭浪舳舻

未能暢行現於初十日行抵安慶省城查探賊船前隊離金陵不遠後隊尙在東西梁山一帶臣立即催齊兵勇馳往應援惟是江南形勢本屬生疏何處守險設防殊難懸揣至前督臣陸建瀛撤回之師船大礮及所調各水勇必身到其境方可相機調撥臣現已飛咨將軍祥厚先行妥爲布置一俟臣到時再行會商辦理一面

飛催長沙岳州所配船蔽不分星夜駛下趕上  
大隊合同前進均奏入

上命軍機大臣傳諭琦善陳金綬向榮曰現在金陵已  
失危急形狀不堪設想該大臣等於二月初十日同  
抵安慶既已會商再四諒必謀出萬全惟賊蹤靡定  
是否占踞金陵抑或窺伺淮揚殊難逆料著琦善陳  
金綬與向榮察看賊勢大江南岸如何攻擊北岸如



何防守水陸要隘如何互爲聲援總期戮力同心速殲羣醜前調吉林黑龍江馬隊將次到齊此項勁旅於渡江不甚相宜著卽留於江北防賊奔竄或於淮徐一帶扼要駐紮以備調遣北岸江浦儀徵瓜州等處江口在在均關緊要必應督兵前往與楊殿邦合力防堵勿稍遲誤東南半壁朕惟該大臣等是倚偵探賊勢勦辦情形必當隨時馳報所過州縣倉糧漕

米俱准酌量動用兩路餉銀亦可彼此通融撥放各  
歸糧臺報銷鄧紹良昨已補授江南提督仍可隨同  
向榮勦賊玉山已調補壽春鎮總兵江北祇此重鎮  
著卽迅赴新任督兵勦捕土匪以專責成

上又命軍機大臣傳諭訥爾經額曰現在江甯失守琦  
善陳金綬向榮卽日督兵前進已諭令該大臣等於  
大江南北兩岸扼要合力攻勦矣賊情詭譎異常難

保無奸細北來窺探希圖勾結土匪爲患界連豫東等處稽查彈壓必須大員督辦與鄰省聲勢聯絡方足以定民志而杜奸萌著訥爾經額體察情形如須親身扼要駐紮卽奏明前往總期有備無患毋致臨事周章

向榮又奏言臣馳抵安徽省城查得正月十七日賊船駛至江岸防兵開礮轟擊賊亦對放槍

礮巡撫蔣文慶登城督陣見南北官兵紛紛跳  
城與城外官兵一同潰散勢不能支回署趕具  
奏稟未及繕清已報賊匪爬城卽將奏稟交家  
丁馮春等隨卽出署登城甫出西柵圍牆巷口  
卽遇賊數十人隨行人役潰散致被戕害巡撫  
關防聞交巡捕盛世忠亦已遺失文武被戕者  
十四員其餘不知下落安徽省城新遭蹂躪其

撫綏彈壓招集流亡事事均關緊要臬司張熙  
宇業已回城籌辦三營官兵亦陸續回營藩司  
李本仁退至舒城縣地方亦經調回省城料理  
撫臣蔣文慶登陴督戰城亡與亡不愧守土大  
吏伏懇從優

賜卹通判楊序鏞等相應開列一併請卹奏入

上諭內閣曰賊匪竄陷安慶巡撫蔣文慶登陴督戰疊

受刀傷殞命尙不失城亡與亡之義著加恩照巡撫  
例賜卹安慶府通判楊序鏞等均著照現在官階加  
等議卹自蔣文慶以下並著於該地方建立專祠以  
慰忠魂其餘安慶城內文武各員並著該撫查明下  
落詳細具奏

上又諭內閣曰據向榮奏查明張熙宇業已回省李本  
仁現在舒城該藩司係該撫奏明留省之員乃於倉

庫錢糧概置不顧巡撫業經盡節而藩司以守土大員竟敢退至舒城顯係棄城逃避李本仁著卽革職拏問交李嘉端會同周天爵按律定擬具奏張熙宇防守小孤山是其專責何以賊船東下輒卽退回著先行革職交李嘉端會同周天爵確查該革員是否與賊接仗抑係聞警先逃據實具奏此外遇賊潰走之文武各員並著該撫等確查奏明按律分別治罪

向榮又奏言內閣學士臣許乃釗奉

旨馳赴陸建瀛軍營因長江水陸兩路梗塞難行於二  
月初十日與臣同至安徽省城知陸建瀛業已  
革職拏問許乃釗仍與臣一同前進俟接奉

諭旨應赴何處軍營再當遵

旨而行奏入

上諭內閣曰內閣學士許乃釗現已行抵向榮軍營著



卽幫同辦理勦捕事宜

同日

上命軍機大臣傳諭李德曰聞山東兗沂曹三府匪徒聚擾情形現雖未著而當逆氛正熾之時心懷觀釁亟應防其勾結著李德卽督率地方文武員弁認真查拏或統兵會勦或購緘躡緝總期淨絕根株毋致養癰貽患現在黑龍江官兵改道由山東行走如該

地方兵力不敷該撫卽可將此項官兵就近暫留數日藉資勦捕朕已命琦善等酌量布置仍著隨時知照毋誤事機

二十日 乙未 陳金綬勝保奏言查該逆已至江甯

占踞對岸浦口地方現在南岸已有向榮由水陸分兵攻勦臣等若再渡江會合不但現無船隻且恐北岸空虛賊易奔竄况浦口與淮徐廬

鳳無爲六安及河南光信一帶道路相通設再蔓延爲患更鉅惟有仰懇

皇上密飭向榮由南岸迅速進剿設法燒斷逆賊浮橋以免賊匪北竄臣等卽遵

旨星速督兵直攻浦口賊營與向榮約定日期南北岸同時並進如北岸浦口賊營一破則南岸賊勢自孤臣等卽設法渡江與向榮會合夾攻似爲

勝算至琦善所帶陝甘直隸已到之兵尙止二千餘名其餘馬步隊均未趕到實在無可撥調前在安慶晤面時曾囑臣等先行琦善卽隨後趨赴接應計臣等一到浦口與賊接仗琦善相距不遠聲勢自然聯絡臣等已於十五日由桐城取道舒城合肥滁州一帶直赴江甯浦口進剿惟到處土匪疊起地方不靖臣等須步步爲

營以防不測惟有極力督兵行走以期迅速前進奏入

上命軍機大臣傳諭向榮陳金綬勝保曰江甯未陷以前逆匪已將浦口占踞若不及早克復則儀徵瓜州等處江口在在堪虞向榮統領大兵水陸並進現在想已渡江著卽分路夾攻出奇制勝其江北一帶著陳金綬勝保督率弁兵扼要駐紮迅將浦口賊營併

力攻破不惟遏賊北竄且可與向榮會合夾攻以殄  
群醜琦善亦不日趕到更可互爲聲援相機接應所  
有逆賊浮橋尤須及早燒斷著向榮陳金綬勝保等  
察看情形何處可以得手卽向何處燒燬總期斷其  
紛竄之路俾進退無據則剿辦方可得力

同日

上諭內閣曰前任湖北藩司唐樹義熟悉湖北地方情

形著卽前往湖北幫辦一切撫輯事宜

上又諭內閣曰湖北武昌漢陽黃州等處先後被賊竄擾蹂躪凋殘深堪憫惻被害官民流亡子女或應掩埋屍骨或應設局收養均著妥籌辦理所需經費務當覈實動用毋任絲毫浮冒俾窮黎均霑實惠地方日就乂安

二十一日

丙申

江南河道總督楊以增奏言江甯

省城失守揚州爲江甯下游清江距揚州四百餘里爲南北通衢無城郭可守無險隘可扼揚州有警則淮安危過淮安則渡黃而北可以直窺東豫誠如

聖諭必須嚴密籌防惟河庫空虛無可支用懇請

皇上天恩飭部酌撥銀數十萬兩星速解浦備支至防守黃河必須扼其來路如揚州爲清江浦渡河



必由之路安徽宿州亳州等處爲徐州府渡河  
必由之路扼其來路則地少而兵力易集徧防  
黃河則兵多而稽查難周且南岸奸匪固應防  
其偷渡而北岸如山東曹單江南邳宿等州縣  
捻幅各匪尤恐其勾通逆賊將收至北岸船隻  
偷放予賊必須南北兼防方足以杜賊蹤臣標  
五營兵丁存營不過一千七百餘名以之防守

五營汎地已屬不敷更無餘兵遏賊北竄之路  
臣通盤籌畫先募民勇數百名以壯聲勢一面  
勸諭團練俾土匪不致竊發民心藉以安定仍  
懇

皇上飭令琦善陳金綬各統大兵十分之七收復江甯  
防堵鎮江蘇州撥十分之三星夜馳赴清江浦  
防賊北竄並撥江南狼山鎮標兵一千名掘港

靖江鹽城三營兵各一百名以備會同堵截洪  
湖南岸鄰近盱眙天長船隻收至清江東清堰  
高堰一帶以免偷渡並遴委能事文武前往募  
勇巡防以期慎密奏入

上命軍機大臣傳諭楊殿邦楊以增曰江北防堵緊要  
河標存營兵丁不敷調遣漕標兵丁亦屬單薄惟琦  
善等所帶官兵可以就近接應著卽遵旨飛催酌撥

協濟所請江南狼山鎮兵一千名掘港靖江鹽城三營兵各一百名並著飛咨調撥以資防守至招募壯勇勸諭團練收集洪湖南岸船隻均著照所議辦理該督等務督飭文武員弁晝夜巡防尤宜彈壓土匪查拏奸細斷不可稍涉大意所需餉銀數十萬兩前因楊殿邦請餉已由戶部議准撥給山東藩運兩庫及長蘆解部各款銀三十萬兩自可通融動用河庫

無論何款亦須先其所急極力籌畫務須加意樽節  
勿稍浮冒

上又命軍機大臣傳諭琦善陳金綬曰逆賊蟻聚江甯  
必藉浦口賊匪爲接應以便牽掣我師梗塞江路必  
須先將浦口占踞之賊剿滅其六合儀徵瓜州等處  
江口均關緊要亦不可顧此失彼此時向榮諒已渡  
江相機攻剿琦善陳金綬等務卽將北岸江口先行

廓清萬不可令賊匪北竄其黃河南北兩岸防不勝防自應擇要駐守重兵如揚州爲由淮入河門戶清江浦爲渡河咽喉著琦善陳金綬迅卽酌撥官兵數千名飭赴淮揚一帶會同楊以增楊殿邦併力防堵琦善所帶之兵刻下想早到齊吉林黑龍江馬隊均可趕到應如何擇要布置該大臣等自必胸有成竹至河南陝西防兵內如須添調卽著酌量緩急辦理

總期前扼江口爲南岸聲援後據黃河爲北路屏障  
是爲至要

同日

上諭內閣曰署理四川總督慧成著卽於陝西省現在  
調赴防所官兵內酌帶數千名迅卽起程馳赴江北  
一帶扼要處所會同楊殿邦楊以增籌辦防剿毋稍  
遲延

同日戶部奏言楊殿邦奏軍需緊要等語臣等  
擬請在山東藩運兩庫籌撥銀二十六萬兩再  
撥長蘆鹽課銀四萬兩共銀三十萬兩以資應  
用奏入

上從之



欽定剿平粵匪方略卷三十 癸丑年

二月二十三日

戊戌

琦善奏言臣於廬州府之合

肥縣探聞江甯省城失守現在陳金綬等業已  
先行臣卽飛咨該提臣等由浦口直趨儀徵徑  
赴瓜州與漕臣楊殿邦籌商渡江繞至龍潭抄  
出賊前會同向榮暨江蘇撫臣楊文定一面杜  
賊下竄之路一面攻復江甯臣先馳赴浦口如

該處尙有逆賊卽率兵攻擊杜其北竄儻不甚  
喫重卽由儀徵瓜州渡江以爲應援至臣現在  
隨帶之兵仍止二千八百名其餘漢中大名吉  
林官兵均尙未到實屬無可分撥一俟有續到  
者卽撥赴陳金綬軍前隨同攻剿黑龍江兵聞  
已抵皖惟無船不能渡江江南亦不能施用馬  
隊應留北岸浦口一帶以資堵截再查楚粵鄉

勇業經向榮遣去七千名乃該勇等並未回籍  
仍冒充向榮兵勇沿途滋擾更恐隨營探聽軍  
情實有誅不勝誅之勢現在向榮尙帶有三千  
餘名自應悉行遣逐又慮激成他故不得已暫  
事羈縻惟有加意嚴防庶不致再爲所誤奏入

上命軍機大臣傳諭琦善陳金綬向榮曰江甯失守賊  
蹤靡定總須南北兩岸互爲聲援南岸如何攻擊北

岸如何嚴防該大臣諒能悉心籌畫謀出萬全刻下  
向榮兵船計已駛到若能上下夾攻乘風縱火將江  
面賊船浮橋燒斷燬其輜重勦辦自易得手所稱馬  
隊不宜用之江南著卽留於江北扼要駐紮以備調  
遣粵楚鄉勇沿途滋擾且恐潛通消息易聚難散別  
滋事端仍著向榮加意防範總以陸續設法遣散爲  
要慎勿勉強羈縻致貽後患近日攻勦防堵各情形

並著隨時馳奏

同日張亮基駱秉章奏言臣等馳抵武昌督飭  
司道暨武漢兩府遴員設局查辦殉難文武官  
紳旬日以來羣有端緒伏思該文武各官當賊  
至而嬰城固守志切同仇值城陷而力盡效忠  
從容就義並有舉室妻孥暨僕婦家丁同時自  
殉者實屬可傷可慘至紳士幕友捐軀被害亦

堪憫惻茲將據報查訪明確者先行開列恭呈  
御覽仰懇

聖恩從優賜卹以勵臣節而慰忠貞奏入

上諭內閣曰上年逆匪先後攻陷武昌漢陽該處文武  
官紳力竭捐軀並有舉室妻孥幕友家丁同時殉難  
者覽奏不勝憫惻湖北巡撫常大滄學政光祿寺卿  
馮培元布政使梁星源按察使瑞元著再加恩賜諡

署湖北提督雙福著交部從優議卹鄖陽鎮總兵署  
雲南臨元鎮總兵王錦繡前河南河北鎮總兵常祿  
均著賞加提督銜卽照提督例議卹與雙福一併加  
恩賜諡襄陽府同知王本立等均著照現在官階加  
等議卹常大涪之子都司職銜常集松等均著照陣  
亡例議卹在籍防守之湖南試用通判殷利謙等著  
一併照例議卹殉難各員道府以上之子孫著俟百

日服滿及服闋後由該旗該部帶領引見候朕施恩  
所有各該員被難之幕友家丁等均著該部查照單  
開姓名照例議卹常大瀆等業經降旨建祠其餘殉  
難文武各官並家屬幕友及家丁等均著一併附祀  
以慰忠魂此外官紳人等眷口盡節者並著查照單  
開分別旌卹未經查出各官紳仍著該署督等迅速  
查明具奏



二十四日己亥向榮奏言連日疊據探報稟稱逆

匪於正月二十八日至金陵城外焚燒民房上下十餘里水道俱賊艘灣泊南岸一帶南門通太平府陸路東門通鎮江府陸路距城七八十里均紮營築堡防我後路追兵金陵對岸浦口地方亦有賊守並時有船隻往來蕪湖縣城搬運糧米臣連日催督兵船揚帆東駛前隊兵勇

已於十四日晚趕抵蕪湖兵勇一擁登岸立將  
守糧之賊殺斃多名餘俱逃竄當將蕪湖收復  
臣於十五日早趕到卽日舍舟登岸由陸路趕  
赴金陵援救惟臣所帶皆係陸兵不習水戰且  
水戰利器必須礮船在先轟擊兵船方能繼進  
現在礮船爲數太少且各路所調礮位未齊祇  
得在蕪湖地方趕造礮船俟調取礮位解到卽

可分配各船再由水路進剿臣陸路之兵先抵金陵城下紮立營盤以爲城內聲援再將蕪湖水次各兵相機前進紮成水寨與陸兵相爲犄角至琦善所帶各兵雖係生力然未經大敵不敢驟令當先臣前在安慶已與面商臣兵先進琦善之兵在後作爲接應至提臣陳金綬與臣當日同隸楊遇春部下最爲相得茲又共事一

方更當勦力同心剷除醜類臣素聞江南民風  
柔懦恐被圍以後目擊心驚相率逃散現在四  
路出示告以大兵已到立即赴援務宜同心固  
守並又恭錄

諭旨破格獎勵團練等因備文專弁繞道入城交將軍  
祥厚一體刊刻曉諭先期固結人心一面酌撥  
精兵勇將設法入城協同守禦庶省垣可保而

大局無虞至閩浙粵東水師與火輪各船臣先  
已飛札催調並令趕緊駛入大江援救金陵又  
恐該逆渡江北竄已飛飭淮揚徐各地方官趕  
緊開挖城濠補葺垛口繕兵練勇豫爲防守奏  
入

上命軍機大臣傳諭琦善陳金綬向榮曰向榮於十五  
日卽抵蕪湖距江甯不遠何以十七日奏報尙不知

江省失守之事豈沿江一帶毫無偵探耶據稱蕪湖城內賊匪逃竄派兵由陸路馳赴金陵現已救援不及祇可於水陸扼要處所相爲犄角以圖克復尤須將水面賊船浮橋先行設法燒燬若南岸之兵離省遠紮營盤北岸之兵又復遠離各江口要隘任賊從容布置爲負隅久拒之計或聽其南北分竄安用該大臣等督兵赴援爲耶

上又命軍機大臣傳諭怡良曰前令怡良赴兩江總督  
新任並催前調之福建兵二千名趕赴江南此項官  
兵想已陸續起程惟必俟各營調齊統帶前進恐需  
時日現在江南防剿喫緊一切軍務亟須調度著該  
督卽行兼程赴任一面催提各營官兵隨後趨行不  
可稍涉拘泥

上又命軍機大臣傳諭慧成曰前令慧成於陝西省現

在調赴防所官兵內酌帶數千名馳赴江北淮揚一帶會同楊殿邦楊以增扼要防剿惟兵數旣多若俟該署督自行帶往未免有需時日現值江防喫緊之際一切調度需人著該署督星速兼程前進一面飭催各官兵隨後趨行勿致稍有遲誤

二十五日

庚子

上命軍機大臣傳諭訥爾經額曰江甯現已失守各屬



隘口防範尤宜嚴密請爾經額居中調度藉可鎮定  
人心不必卽行出省界連黃河及與豫東接壤各隘  
口著卽嚴飭派出之鎮將大員分帶弁兵會同各地  
方官實力巡防儻有土匪竊發奸細潛跡立即嚴拏  
務獲切不可稍有疏懈其江南山東所轄黃河地面  
及淮北一帶關繫緊要已屢諭各該督撫嚴密籌辦  
該督仍當隨時照會與鄰省呼吸相通聲勢聯絡則

查辦更爲嚴密奸匪自無隙可乘矣

上又命軍機大臣傳諭張亮基駱秉章潘鐸曰上年逆匪自粵竄楚所過郡縣望風潰破地方文武除蒲圻縣知縣周和祥外從未聞一人嬰城固守以待援兵而軍營帶兵及防堵各員亦皆聞警先遁赴援不前以致岳州武昌相繼失守此等庸懦畏葸之員若不早正刑章何以肅軍律而厭民志該督撫等於疊奉

嚴旨竟敢置之度外延不覆奏如劉長清余萬清等  
罪名早已審訊定擬朕所以令其解交刑部者原欲  
使供情確鑿共見共聞並非謂情有可原姑緩其死  
俾得從容就道也岳州棄城逃避之博勒恭武罪無  
可逭特因其有墜馬受傷一語若不詳查罪狀亦未  
能昭著是以諭令查辦乃逃回武昌之後直至城陷  
杳無下落該督撫等到省已將市月事事皆能經理

豈獨於此一人竟至無從查考耶阿克東阿業已奉  
旨斬決至今亦未遵旨具奏尤出情理之外似此瞻  
徇玩延是直欲聽若輩隱匿病故以業已身故一奏  
了事在朕則法無可加而該督撫等則自詡陰功盛  
德是何政體是何居心賊匪初竄湖南地方文武猶  
有一二畏法者以力竭自解迨至郴州道州連次潰  
陷大吏從不查叅卽至避匿逃回亦無一言論及以

致效尤接踵習爲故常該督撫等當賊匪在境之時  
或可藉詞無從訪問今賊去已遠被兵州縣中有收  
復已經半載者何至毫無覺察任聽此等庸員逍遙  
事外朕不知該督撫等何顏對此兵燹遺黎也著張  
亮基駱秉章潘鐸於接奉此旨後勒限半月將業經  
奉旨解部及斬決各犯迅速遵辦其失事地方未經  
入奏之文武官吏並軍營將弁一律嚴查定擬罪名

具奏如再遲延遺漏朕必將該督撫等重懲不貸懷  
之

上又命軍機大臣傳諭怡良楊文定李嘉端張芾曰逆  
匪自竄出武昌以後擾及江西安徽江南連陷城池  
各該地方文武員弁除守城殉難各員外均有應得  
之罪所有江西九江所屬地方及安徽省沿江各府  
州縣並江南省被賊處所著該督撫等查明文武各

員有棄城先逃臨敵退避者卽行革職拏問按律定擬罪名迅速具奏毋得稍有瞻徇遲延致干重咎

同日

上諭內閣曰前有旨諭將湖北武昌漢陽兩城殉難各員道府以上之子孫帶領引見因思軍興以來各省帶兵提鎮大員或臨陣捐軀或守城殉難均宜賞延後嗣以慰忠魂除先經降旨准將子孫帶領引見各

員外其餘陣亡殉難總兵以上大員之子孫均著俟  
百日服滿及服闋後由該旗該部帶領引見候朕施  
恩

臣等謹案失律有誅死綏有卹此賞功罰罪  
之權所以整軍而戡亂也當粵逆初出湖南  
沿江郡縣望風瓦解疆臣貽誤兵機生靈慘  
遭荼毒遂致東南糜爛我



文宗顯皇帝赫然震怒嚴喪地之誅而殉難諸臣之子  
孫

諭令帶領引

見聽候

恩施使知倖生苟免者罪無可追臨敵捐軀者賞延於  
後罰則天下畏威賞則天下懷德卒能削平  
禍亂謂非

聖人之神武有以啟佑也哉

二十六日辛丑杭州將軍調任福州將軍有鳳杭

州副都統巴彥岱奏言本月十七日撫臣黃宗

漢來署告知江甯省城於十一日失守臣等隨

派能事兵丁前赴江蘇安徽等處節節偵探賊

蹤一面仍與撫臣黃宗漢選派官兵妥備軍火

利器一有警報立時上城周圍支搭帳房並於

扼要處所安設大小礮位與綠營撫標城守弁  
兵分汛防守日夜梭巡瞭望臣等仍不時督率  
協領等官分段查察並另派精壯官兵五百餘  
員名分清隊伍整齊軍械以備臨期應用惟省  
城周圍三十六里而駐防官兵祇有一千六百  
餘員名綠營官兵亦不過二千餘員名省垣爲  
根本重地城大兵單不足以資守禦惟有速調

福州駐防滿洲兵六百名乍浦駐防滿洲兵四百名飭令委員統帶星飛來浙協同守禦再查武林門外之武林頭爲嘉湖至省要路鳳山門外之鳳凰山距城里許山上設礮可以四面轟擊該二處均係扼要之區現由撫臣多派兵勇於該二處分別屯紮與城內爲犄角之勢以備合力攻剿

同日黃宗漢奏言江甯與江蘇壤地相接儻該  
逆裹脅土匪水陸並進不日即可抵蘇該省鎮  
江蘇州居民遷徙已空兵力又單實有難以支  
持之勢浙省又與蘇省一水可通防堵萬分喫  
緊當卽飛飭處州同知和齡等扼要巡防以顧  
省城門戶臣則會同將軍都統織造督飭司道  
府縣暨在省紳士派員帶領兵勇於城廂內外

晝夜巡查並於武林門外之武林頭鳳山門外  
之鳳凰山各設營盤一座又於十城門由紳士  
捐雇鄉勇徹夜巡邏聲勢極爲聯絡惟省城防  
兵統計滿綠各營不過三千餘名本省鄰省之  
兵均無可徵調所有鄉勇除各處居民自行團  
練外官爲召募者亦不過三千名勦捕尙難得  
力惟有請

旨飭下琦善向榮等迅帶大兵星夜前至江浙交界地面居中策應西面圍剿以冀迅速殲除不致再行延蔓再浙省人心懦怯義勇豈盡屬干城察看杭嘉湖地勢又難堅壁清野雖已竭力布置難保其必能制勝萬一賊氛逼近臣擬馳赴蘇浙交界擇要守禦遏其入浙之路均奏入

上命軍機大臣傳諭有鳳巴彥岱黃宗漢曰逆匪竄踞

江甯若由水路分擾則浙江之嘉興湖州處處堪虞  
有鳳昨已有旨調任福州將軍現在浙省防剿喫緊  
著暫留浙江與該撫籌辦防剿黃宗漢擬赴蘇浙交  
界擇要守禦遏其入浙之路自應如此辦理所調福  
州駐防兵六百名乍浦駐防兵四百名著卽飛催來  
浙以助防守前調福建兵二千名刻下想已起程著  
一併迅催趕到亦可爲江浙兩省聲援葉紹春並著



會同籌辦省城防勦事宜該將軍巡撫等務當悉心籌畫竭力嚴防安撫居民稽查奸細是爲至要

上又命軍機大臣傳諭琦善陳金綬向榮曰逆匪竄入江甯省城鎮江蘇州等屬俱已震動浙省與蘇省水陸毗連情形極爲喫緊向榮現已渡江如攻勦得力自可遏賊東竄陳金綬由浦口直趨儀徵徑赴瓜州現在能否渡江與向榮併力攻擊若能用船礮轟擊

斷賊浮橋燬其輜重並分扼要隘杜賊南北分竄之路則蘇常嘉湖一帶猶可不致擾害琦善駐紮江北尤宜統籌全局相機策應務當嚴密布置毋稍延誤

二十七日

壬寅

陳金綬勝保奏言臣等於二月二

十一日行抵江浦接壤之全椒縣地方接據江浦縣飛稟賊匪屢次犯境俱經該縣文武併力抵禦並未入城惟縣屬浦口地方係江甯對面

一大鎮市現在賊船密泊並聲言指日率衆萬  
餘北渡等情伏思該逆此番過江未必非欲嘗  
試北兵利害臣等所帶兵丁僅四千名尙形單  
弱現已飛調馬隊藉資衝擊惟有相機辦理庶  
可不致失機俟浦口一復卽當咨琦善駐守浦  
口督兵接應臣等卽設法由六合一帶渡江以  
便會合上下攻勦現在向榮已抵和州距江甯

亦祇一百餘里卽日可由上游進剿臣等業已知照定期進兵仍與琦善合防北岸遏賊上竄勝保又奏言江甯一府爲東南保障江甯一失全局震動必須豫爲籌畫逆賊思竄之路亦應早爲防備臣等日思渡江逼近賊營奮力合剿然以大局而論北岸雖有琦善駐守浦口策應而和州直通廬州六安勢不能不分兵據守至

下游北岸由六合可達徐州由瓜州可至淮安  
雖揚州已有楊殿邦帶兵堵禦而淮徐一帶不  
可不豫爲計臣愚以爲宜速飭信陽防兵移紮  
六安廬州等處爲北岸後路接應更宜就近添  
調弁兵在清江浦一帶扼要駐紮爲揚州聲援  
並將襄陽駐守之兵進移湖北漢黃等處以備  
調赴下游堵截賊匪上竄並擬咨令向榮攻勦

江甯西南等門賊營水陸布置臣與陳金綬相機攻剿江甯東南等門若再將廣東調來礮船由水路進擊東下之賊船庶可大挫賊鋒再圖殲擒首逆奏入

上命軍機大臣傳諭琦善陳金綬勝保曰軍旅之事變幻靡定若藉口遵旨株守江北任賊從容布置不但蘇常一帶蹂躪堪虞萬一渡江北窺其能當此兇鋒

不令闖入否陳金綬係幫辦大員且久歷戎行何以  
漫無定見著與勝保迅速籌商先將浦口賊匪剋日  
殲除卽渡江救援江甯亟圖克復其江面賊船浮橋  
務當設法先爲燒燬使賊不能北渡得以併力進攻  
勝保現已補授內閣學士幫辦軍務責無旁貸著與  
琦善陳金綬同心勦力迅掃賊氛並隨時酌量無論  
江南江北何處緊急卽便宜辦理毋得拘泥候旨致

設事機陳金綬等現帶兵丁僅四千名實屬單弱所  
有吉林黑龍江馬隊計已陸續趕到琦善所帶各路  
精兵刻下亦斷無不到之理著卽分撥三四千名交  
陳金綬等大營聽候調遣並著陳金綬勝保飛速催  
提毋任延誤總之江北地面延袤數省防不勝防若  
不激勵將士設法進剿不但糜餉勞師轉恐賊燄益  
熾該大臣等膺茲重任務當妥籌全局與向榮隨時



知照合力進剿毋再觀望遷延任賊紛竄

上又命軍機大臣傳諭羅繞典張亮基駱秉章陸應穀  
曰據勝保奏亟籌大局宜速飭信陽兵移紮六安廬  
州等處爲北岸後路接應更宜就近添調弁兵在清  
江浦一帶扼要駐紮爲揚州聲援並將襄陽駐守之  
兵進移湖北漢黃等處以備調赴下游堵賊上竄等  
語著羅繞典張亮基駱秉章陸應穀將可以調撥之

兵移遠就近一遇徵調卽令星速馳往庶緩急有資  
勦辦可期得力

上諭內閣曰勝保著補授內閣學士兼禮部侍郎銜並  
著幫辦軍務

二十八日癸卯向榮奏言臣馳至蕪湖境後因聞

江甯城大兵單斷難久守星夜馳至江甯縣境  
始知逆賊於正月二十七日先到省城南門外

紮營二十九日及二月初二日均用火箭巨礮  
攻打初四日以後並至水西旱西儀鳳等門四  
面環攻攻城之賊被城內礮火擊斃甚多初十  
日逆匪先攻儀鳳門甚急城內之兵皆聚一處  
堵禦該逆見水西旱西南門三處兵少遂接木  
梯爬城而入四門同時被陷賊隊擁進聞旗兵  
拚命死鬪殺斃賊衆不下三四千人現在城內

滿漢大小各官均無下落臣卽於十八日馳抵江甯縣之板橋查看近城紮營處所詎該逆先於城外多掘陷坑密布竹籤並於長壽橋左右築有土城連紮賊營數座防備甚嚴此外俱係小河無可繞越因查東路孝陵雄黃鎮一帶地勢寬敞進攻較易兼可扼賊竄擾蘇常之陸路當卽統兵繞從秣陵關一帶馳往東路度地紮

營相機進剿惟金陵旣已失守北路空虛誠爲  
可慮臣趕緊飛咨琦善統帶官兵卽於北岸扼  
要之處駐紮設法堵禦杜其北竄之路其淮揚  
徐州一帶臣先已飛咨楊以增轉飭各該處嚴  
密防守矣臣伏思流賊荼毒三載蹂躪六省  
皇上軫念江南惟恐生靈再遭塗炭畀臣以督師重任  
馳往救援並且疊次

嚴飭以此城安危繫於一身茲竟不能先事趕到設法保全實屬負

國負民罪無可遁相應請

旨卽將臣交部從重治罪以爲玩誤不職者戒現在惟當激勵將士恢復金陵盡掃狂寇以冀稍贖罪戾奏八

上命軍機大臣傳諭向榮曰前以安慶失守疊經降旨

令向榮督兵馳赴江甯應援乃該大臣行抵九江住  
閱旬日於本月十五日始抵蕪湖其遲誤之罪與琦  
善之不能赴援安慶無異卽將該大臣等按律懲辦  
明正典刑亦屬咎由自取惟念一時簡用乏人且臨  
敵易將兵家所忌向榮著卽責令帶罪圖功以觀後  
效據稱該逆於城外多掘陷坑密布竹籤並築土城  
紮營數處總因援兵遲緩致賊得以堅壁自守其東

路雄黃鎮一帶既經查明地勢寬敞進攻較易兼可扼賊竄擾蘇常之路現已馳往紮營著卽相機妥爲布置以目前事勢而論總當燬賊浮橋燒賊船隻使江面先就肅清賊匪無從北竄方可專意進攻前調湖南船礮並吳健彰所雇廣艇諒可陸續到齊著卽定期知會水陸並進並隨時知照琦善陳金綬等或於後路策應或於北岸嚴防總期合力兜剿俾賊進



退失據方能制勝該大臣已邀寬典感激之餘必更  
思奮諒能殫竭血誠誓滅此賊以副朕望也

二十九日甲辰大學士軍機大臣九卿會奏言遵

議惠親王等奏請添派重兵前往勦賊一摺臣

等伏查賊匪竄擾粵楚以來二年有餘陸續徵  
調各省兵八萬四千七百餘名連各本省之兵  
共九萬七千七百餘名各省練勇數目尙不在

內經戶部先後奏撥軍需銀二千五百一十萬  
餘兩是兵力不爲不厚撥餉不爲不多雖向榮  
軍營兵勇疊經裁撤尙敷攻剿琦善所調馬步  
精兵亦已到齊刻下向榮帶兵由九江繞至安  
慶業經渡江琦善陳金綬等統帶官兵在江北  
一帶防剿如果水陸並進南北夾攻自無難殄  
茲小醜惟以現在形勢而論逆賊竄踞金陵不

但鎮江京口南岸恐致梗塞卽北岸浦口可由  
陸路直達徐州又可由瓜儀水路徑抵揚州此  
兩路極爲扼要據該王等奏請

特派盛京兵六千名吉林兵二千名自旅順口乘船由  
~~海~~赴江南再調京兵一千名密雲駐防兵一千  
名攜帶京中槍礮及各項器械由運河護送到  
軍營再調西安駐防兵一千名甯夏駐防兵五

百名綏遠城駐防兵五百名山西綠營兵二千  
名甘肅綠營兵二千名陝西綠營兵四千名速  
赴軍營交各該大臣分路攻剿如此厚集兵力  
洵足以寒賊膽而快人心惟查乘坐海船必須  
水師習慣方無顛簸昏暈之虞至兵丁攜帶槍  
礮軍械由運河行走河面偏窄不克連檣且盤  
壩倒牯節節稽遲此時添兵助剿自以陸路馳

往較爲迅速查向榮統帶各路官兵萬餘名又  
已到之陝甘官兵及咨調滇黔武昌等處官兵  
共七千餘名琦善陳金綬等統帶京火器營及  
吉林黑龍江馬隊並西安青州駐防直隸山東  
山西陝甘各等處官兵一萬七千三百四十名  
兩路官兵已逾三萬昨復欽奉

諭旨命兩江總督怡良帶福建現調兵二千名署四川

總督慧成帶陝甘現派防兵數千名星馳赴剿  
儘能剋期會集均足爲該大臣等前後應援惟  
刻下防剿喫緊擬請將現在桐城之山東兵除  
琦善奏帶外尙有二千餘名均令趕赴楊殿邦  
楊以增軍營交其管帶其防堵襄陽奏撤之直  
隸大名宜昌陝甘湖廣雲南各標鎮兵三千四  
百五十餘名均令趕赴江北琦善陳金綬軍營

由該大臣等擇要調紮以爲兩岸攻勦之助且可兼顧瓜儀一帶江口仍令琦善體察兵力如須添調卽由陝甘總督舒興阿於調赴商州防兵內再酌調二三千名以遏北來之衝是於江南江北原有重兵之外更添生力勁軍七八千名合怡良慧成所帶之兵增添又已逾萬人與惠親王等奏調駐防綠營兵數相符且覈計程

途均距江皖甚近較之遠處徵調更爲便捷至  
所請酌量挑選京兵一千名密雲駐防兵一千  
名西安駐防兵一千名甯夏駐防兵五百名綏  
遠城駐防兵五百名共四千名內除密雲駐防  
兵一千名京兵一千名均未便遠調其西安駐  
防兵一千名甯夏綏遠城駐防兵各五百名可  
否請



旨飭令各該將軍選派得力營員迅速管帶起程交辦  
成調遣至現已奉

旨豫備候調之吉林兵二千名黑龍江兵二千名可否

一併請

旨飭令該將軍派員分起管帶迅卽來京並請

特簡重臣統領前往大河南北扼要地方駐紮相機防  
剿以爲各路官兵聲援其請交察哈爾都統訓

練之察哈爾馬隊兵四千名歸化城土默特馬  
隊兵一千名共五千名交熱河都統哨地紮營  
至黑龍江馬隊二千名東三盟蒙古馬隊兵三  
千名共五千名內除黑龍江兵二千名業經請  
旨飭調外其餘各處馬隊兵並調察哈爾馬匹應否一  
併飭令豫備請

旨定奪如蒙

俞允所有西安甯夏駐防兵由陝西籌款支領起程綏  
遠城駐防兵由山西籌款支領起程其吉林黑  
龍江官兵應先由吉林黑龍江

盛京三處墊發由戶部籌款撥還此次添調各處  
滿漢官兵爲數較多需餉甚鉅應請

賞給內庫銀五十萬兩以應急需至黃河以北衝要標  
營之兵有調赴各處者應將本省各營彙酌撥

補認真訓練並如何辦理益臻嚴密之處應請  
旨飭下直隸總督山東河南巡撫妥爲布置互相策應  
總期有備無患以固衆志而靖地方奏入

上命軍機大臣傳諭琦善陳金綬勝保曰本日據大學  
士軍機大臣九卿奏稱請將前在桐城之山東兵除  
琦善奏帶外其餘各兵均令赴楊殿邦楊以增軍營  
交其調遣防堵襄陽奏撤之直隸大名宜昌陝甘湖

廣雲南各標鎮兵三千四百五十餘名均請交琦善  
陳金綬軍營擇要調紮以爲兩岸攻剿之助且可兼  
顧瓜儀一帶江口仍請令琦善等體察情形如須添  
調卽由舒興阿調赴商州防兵內再酌調二三千名  
等語琦善等先後調撥官兵已有一萬餘名此次添  
調之兵或先已檄調或現在各處分防應如何調撥  
備用其會奏摺內兵數與現在軍營各處兵數或有

參差之處均著酌量辦理不可拘泥牽就致有延誤  
現在防勦萬分喫緊斷不可因奉有添兵諭旨又復  
姑待也

上

又命軍機大臣傳諭楊殿邦楊以增曰現在江北防  
堵緊要所有前此調往江南之山東官兵據琦善奏  
稱現存桐城尙有三千餘名除該大臣奏帶一千名  
外尙有二千餘名著楊以增楊殿邦迅卽飛調以供

防守若此項官兵復經他處調派或不敷一千之數  
卽著該漕督等飛咨欽差大臣軍營酌量調撥勿得  
拘泥原奏致誤事機

上又命軍機大臣傳諭恩華英隆曰前有旨令於吉林  
黑龍江各選精兵二千候旨調遣著該將軍等卽遴  
派妥員管帶各官兵備帶軍裝器械迅速來京毋得  
遲誤

上又命軍機大臣傳諭舒倫保成凱托明阿曰著於西安駐防兵內挑選精兵一千名甯夏綏遠城駐防兵內各挑選精兵五百名配齊軍裝器械委員迅速馳赴江南淮揚一帶交慧成調遣

上又命軍機大臣傳諭慧成曰本日據大學士軍機大臣九卿會議請添調西安駐防兵一千名甯夏綏遠城駐防兵各五百名請飭各該將軍派員管帶迅速



起程前赴淮揚一帶交慧成調遣該署督卽遵旨催調以備防剿之用

上諭內閣曰前據惠親王等奏請添兵剿賊先後交大學士軍機大臣九卿會同戶部議奏茲據覆奏所議各條均屬周妥現在欽差大臣向榮統帶各路大兵並續到之陝甘官兵咨調之雲南貴州湖北等省官兵欽差大臣琦善幫辦軍務陳金綬勝保等統帶京

火器營及吉林黑龍江馬隊並西安等處駐防直隸  
山東山西陝甘各處官兵分路攻剿怡良慧成復帶  
福建陝甘精兵星馳會合南北兩路併力進攻惟東  
南數省蒼生疊遭荼毒朕每一念及寢饋難安仍宜  
厚集勁兵迅殄羣醜著將現在桐城之山東兵先令  
趕赴楊殿邦楊以增軍營交其管帶其由襄陽撤回  
之直隸大名宜昌陝甘湖廣雲南各標鎮兵均令趕

赴江北琦善陳金綬軍營由該大臣等擇要調紮以爲兩岸攻剿之助仍著琦善等體察兵力如須酌添卽由舒興阿調赴商州防兵內再行咨調以資策應以上各路重兵覈計程途均距江皖甚近不難迅速到營並著西安甯夏綏遠城各將軍將諭調各處駐防官兵均卽選派得力營員迅速管帶起程交慧成調遣前此備調之吉林黑龍江各官兵著該將軍等

亦卽派員分起管帶由京前進至所請調察哈爾馬  
隊官兵歸化城土默特馬隊官兵蒙古馬隊官兵及  
察哈爾馬匹著各該將軍並東三盟蒙古王等一併  
豫備候旨遵行